

景明刻本鹽邑志林

十三

前令鄭壺陽靖海紀畧

鹽邑志林第十九帙

鄭端胤

黃岡後學樊維城彙編

後學姚士麟訂閱

劉祖鐘

嘉靖甲寅夏四月五日乙亥夜漏下三刻堠卒報
二海舶自乍浦而來昏黑不辨誰何余卽登城遠
望召居民分堞以守越六日丙子黎明二舶抵龍
王塘吹法螺衆乃知爲賊云先數人泅水登岸餘
皆躡其後各衣青白執弓矢利器合五百餘徒直
趨東門箭之入也電飛雨驟軍民莫敢俯視乃張

佛狼機一條鞭鑿擊賊稍引退因自焚其舟並小東關及民居二十餘家遂沿塘而南渡興福橋葉家橋以至西門委蛇曲折若熟路然先是兵憲陳公在縣旬餘因廣陳告急乃以兵五百往而是晚賊至矣衛縣官奉委而出惟余與簿陳子鍊及揮使方君泰彭君端在時丁把總劉大仲諸兵皆隨盧叅戎往往征廣陳城中股慄無敢櫻其鋒者余乃急塞四門諭居民以城賊不兩立須效死衆皆惟命余恐賊多譎因謀方揮使募勇夫出偵焉果有二賊伏塘下斬首級一並取船中鐵佛狼機三架

以歸噫幸其無藥可試耳不然虎而翼之害又當
若何已時遂攻西門燬民房三百餘自天寧寺而
止皆鞠爲煨燼煙塵蔽空矢鏃交集城中火器響
應屹立不少動擊斃一賊餘遂退屯鍾孫諸家及
天寧寺左右晚復分擾城下群情洶洶乃與諸君
分守各門方東彭北後改指揮劉君湖南西則余
與陳余仍左右督焉邑博士鄭君歐陽君許君暨
諸縉紳先生賓造秀士咸徒步鼓勇爲士卒先每
檠軍民各一合十有五檠胥史一人攝之益以敵
臺驍兵勇壯老人攝之人各米二升燭五枝夜及

子賊以長竿掠北城探虛實守堦者以亂石擊退
是夜馬不停鞭火不滅燼柳鈴矢石之聲更相屬
繞城六匝天始辨曙賊乃解圍卽二家晨炊而去
遂侵錢家店半邏橋未時抵嘉興郡郡備亦虛不
虞其猝然至也幸兵憲公自平湖提兵來援吾鹽
中途聞報而疾趨抵郡甫入關而賊先鋒白旗至
矣燬東關外數十家其沿城一帶則府中業已撤
而去之是日兵憲暨郡守劉公親誓杭湖等兵出
戰於鹽倉橋斬獲二十餘賊披靡却還吾邑至半
邏橋宿焉自賊之來也請兵告急無慮數十次竟

莫有至者乍浦戰艦亦寂然無聞平日豢餌胡爲
耶日已西矣盧丁始提二千餘兵來聞賊已長驅
遂兼程前進戊寅與賊遇於本縣之孟家堰倉卒
阻河爲陣不知賊已先伏舟中預作奇兵初一陣
劉大仲先鋒少捷再一陣賊鼓噪而前伏從中出
我兵大潰自相蹂藉鎗死箭死刃死者二百餘溺
死者至千以上海寧衛指揮李元律旗牌千戶薛
珙宋應蘭死之義士劉大仲與其部下殲者過半
餘皆漳廣龍泉泰和諸兵橫尸蔽野疊血成川葦
葦麥隴轉作戰場淅淅風聲盡皆鬼泣自用兵以

來未有若此之酷且多也報至兵憲公郡守公痛
惋垂涕卽命官檣殯鄉諫議大夫錢公復市地募
衆諭耆民張亭董其事亭不辭臭腐朝夕掩瘞自
是道無遺骼余前後亦遣人督之然諫議之力居
多余守土者且愧焉乃飯僧修懺爲文以吊之初
軍門之遣劉大仲也專爲吾鹽計自入春以來盧
叅戎召之無虛日淞江海沙二捷實爲先鋒盧反
蔽而抑之衆憤恨有後言比三月終諸兵乃復以
故土盧又日召之余已逆知其必有今日乃貽書
往止之謂金山以北原非浙轄舍已急人義實不

然盍休養之以爲鹽百萬生靈計疇昔之事不足以鑒乎渠固執弗允乃請諸當道亦不能得蓋其急于成功以贖已罪故他不遑惜焉至是鑄錯無鐵噬臍無及可恨哉方其迫寇金山還師乍浦百里而趨蓬頭繭足藟糧且不飽焉乃復窮其力以逞老馬而不顧其後亦安能無路蹶之虞哉比次孟家堰也崎嶇凸凹陣不能成列兵不能轉刃突如而來地利已失如之何其不北是日盧兵奔澈浦賊午後復至吾鹽城下知不可犯乃去是晚丞林子士儀歸自乍浦丞朱子光裕尉李子茂歸自

郡城揮使劉子岱松歸自平湖乃協力並守巡督
益嚴嗣後惟開西門出入諸水關皆瓦礫軍民守
堦如初夜給以燭間施升米之惠置竹牌以避矢
石建蓬廠以禦風雨修鞭銃火藥弓矢以壯軍實
皆先後就緒可裨實用旦則詣縣治兵事夜則宿
西城樓視公廨若浮萍鄉之民多襁負而來城中
亦無復謀他徙者已卯賊犯宋亭村宰牛而食庚
辰登秦駐山辛巳越澈浦踰黃灣至石墩巡司及
天妃宮駐焉是日又三百餘賊自淞江突入嘉善
縣治火民居漕舸直奔郡城又火六里街值新募

狼兵四百人至遂合戰敗之斬首二十有奇唯陳
劉二公郡以外其墟乎壬午餘黨從新豐太平橋
出海鹽塘望金山以去而石墩諸賊遂盤據不動
中丞王公乃檄僉憲領兵羅公盧張二叅將及周
都閫應禎督兵下屯海寧邑庚寅公單騎直抵邑
中懸賞罰飭部伍戒諸將以無忘此仇恥經三晝
夜乃歸辛卯戰石墩狼兵傷者數人壬辰賊掠黃
灣至天仙府高家橋癸巳轉掠談家嶺裴家村燬
民居且盡乙未盧周部水陸諸兵屯園花鎮崇教
寺賊掠黃灣西寺而去又明日轉掠紫雲村一踪

出西旱橋一踪出黃山嶺伏菩薩寺與周兵戰誘至寺中伏兵四起周馬陷泥淖中死之並殺其部下二千餘人自是賊益鴟張信噬晝則分邨四出夜則復歸巢穴據險乘高立柵自固攘金帛汚子女薄室廬萬姓忿恨無所控訴諸官兵依違觀望以得脫爲幸雖狼兵號稱悍鷙亦莫敢弯弧爭死敵每鄉氓自擄歸者云倭人禿頭烏音不滿二三百餘皆寧紹漳廣諸不逞之徒潛勾鬼蜮竊據門庭至莫可救藥越五月庚子朔賊復掠黃岡麥墩端午甲辰復報二百餘賊泊秦駐山鮮魚嘴入姜

家村焚劫不移時登舟爲水兵所逼至酉復棄舟
從談家嶺西鹽倉南投硤石不與石墩合蓋又一
邨類也乙巳石墩賊薄海寧盧兵出戰于二十里
亭不利而退丁未硤石賊犯崇德轉至石門石墩
賊掠園花山由腹裏至麥庄橋戊申掠九都大康
橋鄉有曹袂曹禎者預集諸鄉兵揚幟鳴金若將
迎敵賊不敢渡河余隨遣人賁旗匾往獎焉匾曰
保護鄉閭將以風來者庚戌復犯澈浦初欲奪兵
船不能得卽進攻南門午轉而東三十人將弓矢
板牕薄城下餘劄立河畔城上軍民奮勇協擊銳

砲矢石無虛發傷二十餘移時乃去遂火總寨道
院及民居一望赭然晚復歸黃灣男婦奔逃殺死
者無紀澈浦海鹽右臂孤危尤甚火具戎器朽乏
不堪用郡守公日遣人賁致城之不爲狐窟鼠穴
者公力也又有統兵揮使徐君行健丞黃君鶴尉
李子在徐勇畧嚴明能出死力部下畏之李屢隨
征勦氣壯而弗懼亦簿書中之甲兵者故保護無
虞然其勢亦孔棘矣自辰至于申沿塘閭靜偵諜
之卒不敢前邑中皇皇至于旦乃休辛亥石門賊
轉掠王江涇嘉興子弟兵敗績傷二百餘乍後二

所又報有賊自金山而南僅十有八人壬子侵平湖嚴州守禦百戶朱某追擊于新豐死之蔓延四五日乃成擒是日大步山又有賊四十餘登岍至城外朱家橋至清風圩淡井廟過河宿三里橋衆皆謂賊少兵多勦之宜余私計日且暮兵又非夙戒出奚難難於入乃止之越次日癸丑乃邀丁總兵及李尉督杭湖衛卒勇壯千餘人出追之卽天寧寺禡祭余與方揮使諸君舉酒誓祝兵皆踴躍有生氣余隨治糗糧命小舟賁送甲寅追至嘉興郡賊已先屯石塘灣張叅戎二千餘兵出拒塘左

右滌水不徑不可入麻又蓊鬱賊從中突出張兵
駭散死滿壑者百餘時我兵猶未至比至則賊已
東奔入嘉善界矣乃全師而歸邑人猶恨不與決
一戰角生死丙辰石墩賊復出談家嶺故爲復攻
澈浦狀遺竹梯灰石于道以懼我十八日丁巳遂
移輜重入舟中揚帆宵遁水兵四面縹繞用發楫
大佛狼機迎擊丙辰震撼之聲轟然海上波濤
爲之變色詰朝戊午獲巨艦一斬首者二百有奇
溺死者無筭惟遺一舟巨寇大憝一朝殄滅千軍
萬姓無不鼓舞更生思磔其肉而飲其血云是捷

也統領兵船揮使劉君隆潘君鼎實綱紀之千戶
晏君繼芳相左右焉奮翼桑榆過緣功準亦不負
肇創之初心焉先是都臺兩院守巡兵憲諸司道
憤蜂蠆之流殃悼虎旅之無烈乃厯思遠畧廣募
驍銳命諸將分路夾攻尅期並舉又召戰艦悉集
澈浦預扼其歸路至是果收此奇勲爲東南樹保
障猗與休哉嗚呼劇寇方殲別鄙猶熾吳淞之鼓
輦未息平湖之舳羽屢聞極目關廂風煙慘淡顧
瞻村落鬼火熒煌雖赤壁焚舟幸假周郎之便而
殺函雪恥猶切孟明之心藉市井于戎行未免驅

羣羊以角猛虎空陸營于北郭尤恐藉寇兵而賁盜糧民固若禾黍之望耳雨天將挽銀河以洗甲兵杜彘懷來尚有資于群策竭力死守敢自負其平生謹叙顛末用告僕夫告捷後二日庚申武原傲吏壺陽鄭茂撰

按公守禦全我城社爲功最鉅家藏有此述每詢長老及諸世家卽此亦未有能知者可慨也余嘗欲白當道特建祠祀公不果至有謂舉名宦爲便余甚不然當自有說適閱此述命兒手錄示同志而固藏原本亦以存公之文學政事